

欽定剿平粵匪方略

欽定勦平粵匪方略卷五十六 癸丑年

八月二十二日甲午

上命軍機大臣傳諭恩華托明阿曰現已授勝保爲欽差大臣仍令恩華托明阿幫辦軍務勝保與善祿西凌阿等所帶馬步各隊僅四千餘名兵力尙形單弱亟須各路官兵會勦現留駐懷慶清化鎮馬隊尙有三四千名此項馬隊勁旅最利追勦著恩華迅卽帶

領前進不可以有用之兵置之無用之地其清化鎮  
應留兵若干卽著該尙書酌量辦理賊匪飄忽靡常  
洪洞以東可由浮山岳陽竄赴潞安北可由山西小  
徑竄入沁源一帶勝保等督帶各兵擬由趙城霍州  
過韓侯嶺繞出賊前保護太原托明阿由澤潞一帶  
進兵正可迎頭截擊恩華由垣曲前進著卽沿途確  
探賊蹤與勝保會合相機追截馬隊行走迅速不難

繞出賊前經過地方被賊滋擾之處夫馬等項恐一時未能齊備勝保所帶之兵卽不免星夜步行瓜菜充飢事有緩急豈可拘泥延誤恩華托明阿等務宜設法飛催進剿激勵將士兵丁奮勇爭先迅殄羣醜廓清晉境卽以保衛畿疆勉之慎之

二十三日

乙未

向榮許乃釗奏言賊踞金陵其南

門一面以雨花臺爲犄角而雨花臺又恃城外

大街爲羽翼賊目多在街內盤踞官兵攻雨花臺賊營時逆黨卽從街中竄出包抄是以難於得手必先毀去大街則臺上之勢自孤惟雨花臺屢被攻勦該逆防備愈嚴東面大路業被截斷祇有鳳臺門一帶尙可繞越前進因派提督蘇布通阿總兵虎嵩林督同副將西林遊擊蔡應龍張國樑等挑選健卒二千人於十二日寅

刻繞至雨花臺西張國樑率勇先至街尾縱火  
賊從火中逸出奔雨花臺我軍追擊斃賊甚多  
惟後路接應兵勇以路徑繚曲樹木叢雜僅側  
身而進不能大隊擁入是役街內房屋焚去大  
半未逃出之賊盡行燒斃而城上及雨花臺賊  
匪槍礮不絕我兵在街中者過於單薄因與各  
路伏兵均仍撤回此十二日進攻南門情形也

至鎮江攻勦情形准和春等文稱初八日水師各鎮將派師船分爲四隊乘東南風進擊北固山一帶礮隄隄前有賊船數十隻分泊守護被我軍擊沈數隻斃賊甚多又燒燬木礮臺一座餘匪潛伏不出其瓜州北岸均築礮隄護以礮船二百餘隻我師船乘風近前開礮擊倒望樓二座轟沈賊船十餘隻斃賊無算隄內賊皆伏

匿但聞人聲鼎沸因風力漸微篷舵餓使不便  
傳令收兵和春聞江上礮聲亦卽督兵出隊東  
南兩門賊皆堅閉不出惟於城上施放槍礮抵  
禦此初八日鎮江水陸進攻情形也再探得南  
門一帶係逆匪前二軍把守先經密飭張國樑  
倣製賊匪號衣數百件於進攻時遣親信壯勇  
埋伏於雨花臺及南門左近專俟城內賊黨出

救或外賊敗退入城卽令該勇趁勢溷進城中  
俾大隊奪門而入乃該逆堅閉不出此策未得  
施行祇可避實擊虛別圖善衛我兵連次在南  
門攻擊探聞西北守城之賊又多撤赴東南現  
復派弁蹕覓路途務使有隙可乘期在必得奏

八

上命軍機大臣傳諭向榮許乃釗曰此次焚燬南門外

賊巢雖有燒斃斬獲究未能攻奪雨花臺斷賊援應  
卽鎮江水陸進攻亦未能得手該大臣等頓兵城下  
爲日已久若不別圖良策設法圍攻必致師老餉匱  
其患何可勝言金陵揚鎮三城該逆聯爲一氣總由  
不能肅清江面之故節次諭令葉名琛等雇備船礮  
並令湖南湖北製造戰船其紅單船隻已抵閩洋著  
卽飭令和春麟桂等迅速催提駛入江口爲水陸夾

攻之計至所稱張國樑擬遣親信壯勇溷入城中爲奪門之計旣未得施行此外有無善策可以出奇制勝著再集思廣益速奏膚公

同日桂良奏言接據山西來咨賊匪由洪洞東竄如出晉境卽與河北之武安彰德直隸之順德廣平相距不遠臣當卽飛咨訥爾經額迅速派兵就近堵截併飛飭接壤各地方文武一體

嚴密防守臣一面於省城內外加意設防務期  
鎮定人心不敢稍涉張皇亦不敢稍形疏懈奏

八

上命軍機大臣傳諭桂良曰畿輔拱衛京師防堵不可  
稍懈除著名關隘業經布置防守外其偏僻路徑並  
著飭令各地方官實力巡查訥爾經額已回正定該  
尙書鎮守省垣尤宜盤詰奸宄毋令乘間溷入其團

練鄉勇是否著有成效並著督飭地方官會同紳士  
實力妥辦以期有備無患

上又命軍機大臣傳諭勝保郭夢齡日前因賊匪由洪  
洞東竄當諭令勝保飛催援兵應由何路接應妥爲  
布置哈芬現已拏問其原帶出省之文武員弁及隨  
帶兵丁應否撤歸省城抑併歸勝保軍營著該大臣  
與郭夢齡斟酌分派托明阿由澤潞一帶前進正可

截擊東竄賊匪恩華所帶官兵爲數不少並著該大臣迅催前進如賊蹤折向北竄勝保等自應扼要迎擊保衛太原省城若賊由潞城黎城等處山口關隘乘虛竄出卽係入直隸之路勝保仍須跟蹤窮追盡力殲勦逆賊避實擣虛是其慣技切勿大意致墮奸計

上又命軍機大臣傳諭訥爾經額曰賊匪由洪洞竄出

是否經沁源太谷徐溝徑趨太原抑由岳陽長子直  
撲潞安該督甫自懷慶起程定已就近探知賊蹤所  
向嚴密籌防北路大同宣化一帶直達居庸關固與  
京師接壤卽由龍泉倒馬各關東趨紫荆關亦可徑  
抵易州各路關繫均屬緊要現在勝保已由趙城等  
處帶領馬隊扼賊北竄之路該逆若聞風東竄分股  
蔓延潞安緊接清漳由黎城武安至臨洺關或自平

定固關而入井陘獲鹿均須節節嚴防庶可杜其竄  
越前據該督奏請將盛京兵二千名改駐正定吉林  
兵二千名分駐保定省城及臨洺關朕思吉林勁旅  
合則聲壯分則力單應如何歸併一處以壯聲勢著  
該督體察情形妥籌辦理勝保與善祿西凌阿所帶  
馬步各隊現止四千餘名該督咨稱追勦赴晉之兵  
已有一萬四千餘名之多除郝光甲董占元共帶兵

二千三百名尙未趕到其餘七八千名係何處官兵  
於何時起程由何處行走抑係在途逗留著卽查明  
具奏仍嚴檄飛催迅赴澤潞一帶與勝保合力迎勦  
萬勿遲誤並著將一切布置機宜隨時知照勝保等  
大營總須直隸山西聯爲一氣聲息相通

同日

上諭內閣曰前以逆氛肆擾疊降諭旨令各督撫曉諭

紳民舉行團練自衛鄉間直隸省團練是否辦有成效未見入奏現在晉省賊匪由洪洞東竄已飭各路官兵四面兜擊自不難悉數殲除直隸與山西接壤各口要隘雖經派有重兵防守尤賴兵民同心藉收衆志成城之效著諭爾經額再行申諭地方官吏認真董勸該紳耆等各就地方情形妥速布置其能實力奉行團練有效以及捐貲集事者著卽隨時保奏

朕必立予恩施畿輔民風素屬急公好義其各協力  
保衛毋負諄諄誥誠至意

二十四日丙申

上諭內閣曰昨命勝保爲欽差大臣勦辦竄擾山西逆匪各路官兵統歸節制並飭領兵大員等合力兜圍自不難迅速殲除剋期奏凱惟軍律首貴嚴明將士方能用命近覽軍營奏報鎮將備弁中或以守候軍

火夫馬藉口逗留或以防堵遠僻地方抗不遵調畏  
葸玩誤幾至相習成風縱賊殃民深堪痛恨勝保特  
膺簡任總統師干著頒給康熙年間安親王所進神  
雀刀由恆春齋往山西交勝保祇領如有不遵調遣  
任意遷延甚至臨陣退縮貽誤軍情著提鎮以上著  
該大臣據實叅奏聽候諭旨其副將以下各員弁卽  
著一面正法一面奏聞以肅軍令該大臣其嚴申紀

律迅埽賊氛

二十五日

丁酉訥爾經額奏言臣現已行抵衛輝

星夜馳詣順德正定一帶將直晉交界大小各關隘趕緊布置周密卽統兵由獲鹿井陘赴晉探明賊蹤迎頭截擊務期淨埽餘氛至署提臣保恆已於十八日帶兵出省日內計可行抵固

關奏入

上命軍機大臣傳諭訥爾經額曰逆匪剽忽靡常避實  
擣虛是其慣技易州一帶雖有泰甯鎮駐紮兵力實  
形單弱該督務當派委得力鎮將統帶精兵馳赴紫  
荆龍泉兩路擇要防守萬不可稍有疏忽保恆已抵  
固關則獲鹿井陘一路卽飭令探明賊蹤迎頭截勦  
直隸與山西交界要隘甚多該督自應統籌全局扼  
要調度若統兵由獲鹿入山直赴晉省儻賊從他處

竄出我軍又恐落後總當體察情形密速偵探何路  
緊急卽督飭官兵由何路迎勦如兵力不敷分撥所  
有駐紮南苑之察哈爾官兵四千名駐紮天津之盛  
京官兵二千名均可酌量奏明調遣

二十六日 戊勝保奏言 臣前於趙城拜摺後卽  
行督兵起程由霍州靈石介休一帶遄行於二

十二日抵平遙查靈石介休平遙等州縣附近

霍山山路可通之處甚多而以關子嶺審頭村  
古寨村爲最要其祁縣太谷等縣復有黃花嶺  
子洪口爲要隘當賊甫東竄時臣卽咨會哈芬  
郭夢齡分撥兵丁嚴防惟山西兵丁未經戰陣  
不可深恃復嚴札各帶兵官認真督率毋稍貽  
誤一面咨催托明阿迅卽督兵由澤州取道潞  
安探明賊蹤由東南路迎擊一面飛催西凌阿

馬隊並飛飭郝光甲之兵速由浮山曲亭西南  
路一帶跟蹤追擊臣與善祿等由東北路繞出  
賊前督兵夾擊以期迅殄羣醜其由保定調回  
之山西兵丁二千七百名業已飛飭該帶兵官  
就近在遼州一帶駐紮扼其東竄河南直隸之  
路探聞該逆現在岳陽沁源縣屬之舊縣府城  
鎮等處盤踞二日因聞各路有兵欲圖東竄潞

安東北竄沁州恐其由潞城黎城和順遼州一  
帶竄入河南武安涉縣等處滋擾不可不先事  
豫防已飛調德坤雙成挑選官兵八百名卽由  
澤州取道路安一帶前來扼要截擊

同日桂良奏言臣前因賊氛未淨疊飭地方文  
武盤查奸細以杜勾結茲據東明縣知縣丁學  
易拏獲奸細陳登心解省訊供係賊營僞官誠

恐同來夥黨不止一人現在嚴行審訊一俟問明盡法懲辦至省城紳民練勇及官局練勇臣當勤加訓練務期一律嫻熟以資得力均奏入上命軍機大臣傳諭勝保恩華托明阿曰逆匪由洪洞東竄後勝保卽督兵由霍州靈石介休一帶馳抵平遙繞出賊前並於各處隘口分撥嚴防探明該逆現在岳陽沁源縣屬地方盤踞二日欲圖他竄該大臣

已咨催托明阿督兵由東南路迎擊西凌阿及郝光  
甲由西南路跟追調回之山西兵二千七百名令在  
遼州一帶駐紮並飛調德坤雙成帶兵由澤州取道  
潞安一帶扼要截擊布置尙爲周密惟賊勢剽悍異  
常該處隘口紛歧山西兵丁未經戰陣難資得力托  
明阿由澤州取道潞安著卽督兵星速前進一路探  
明賊蹤迎勦恩華統帶馬步各隊此時行抵何處著

卽督催前進沿途偵探賊由何處分竄卽迅赴何處  
追勦其直隸河南各要隘已諭令訥爾經額桂良等  
嚴密籌防該大臣等仍隨時知照訥爾經額互相接  
應勝保身爲統帥並頒給神雀刀俾肅軍令該大臣  
一切賞罰務須公正嚴明以期人人用命恩華托明  
阿幫辦軍務均屬責無旁貸其各同心協力迅埽賊  
氛山西與直隸交界要隘甚多恐賊匪被勦窮蹙又

從山徑乘虛竄出必須四面兜截聚而殲旃萬不可  
稍有延誤

上又命軍機大臣傳諭桂良曰山西代州地方有小道  
可通紫荆關直達易州儻賊由此路奔竄關繫甚重  
該處雖有泰甯鎮總兵駐紮兵力未免單弱昨已諭  
訥爾經額派兵前往扼要防守桂良駐紮省城相距  
不遠並著迅籌布置嚴飭文武員弁實力堵截隨時

偵探盤緝奸宄勿任偷越東明縣既經擊獲奸細陳  
登心卽當嚴訊究明賊匪東竄蹤跡豫爲準備此等  
奸徒溷入直境諒必不可少仍著嚴飭各地方官密速  
查拏毋稍疏縱

上又命軍機大臣傳諭訥爾經額曰勝保奏逆匪現在  
岳陽沁源縣屬之舊縣府城鎮等處盤踞二日欲圖  
東竄恐其由潞城黎城和順遼州一帶竄入河南武

安涉縣等處滋擾不可不防等語直隸與山西省毗連地方此路亦最關緊要必應派委得力將弁扼要堵截仍著該督卽飛催調回之山西兵丁二千七百名迅速前行卽遵勝保札飭在遼州一帶駐紮扼其東竄河南直隸之路又據桂良奏東明縣拏獲奸細陳登心訊係僞官嚴加審究等語此等奸匪潛行窺探恐溷入直境者尙復不少著訥爾經額嚴飭各屬

於各路要隘實力查拏毋任偷越

二十七日 己亥 托明阿奏言 臣督帶官兵由太行

小路翻山趨行於十八日馳抵山西長子縣探  
得逆匪在該縣廸西百餘里隨據隨竄 臣卽會  
同明慶督催馬隊由捷徑迎擊步隊繼進十九  
日行抵屯留縣之豐儀鎮探報該逆約有一千  
餘名距豐儀五六十里臣正催提步隊復報該

逆已陸續前來臣先督馬隊翻山迎勦該逆二  
三百名從山頭撲下我兵迎擊斃賊十數名該  
處南北皆山中間河水紓折突由河灣繞出逆  
匪二百餘名以抄我後南北兩山亦有賊三四  
百名蠭擁撲來臣所帶隊僅二百餘名難以分  
撥因督令先擊抄後之賊不意該逆由北面土  
山施放鳥槍正中臣帽槍子由腦骨穿出血流

昏暈當督戰之際恐兵丁驚懼忍痛鏖戰適步  
蹤趕到分投迎擊斃賊二百餘名該逆潰敗翻  
山奔竄復追殺五六十名收隊紮營臣因中傷  
督戰多時血流不止到營後不能支持現當追  
勦喫緊之際實恐卽難就痊有誤事機惟有籲  
懇

天恩賞假調養俟稍平復卽行銷假查已革副都統明

慶出師多次督兵有方臣現帶之兵除令原帶  
協參領等管帶外先令明慶統率趕緊追勦毋  
任殘孽稍得喘息以期及早殲滅奏入

上命軍機大臣傳諭勝保托明阿曰托明阿由澤州翻  
山迎勦於屯留縣豐儀鎮地方遇賊接仗擊斃二百  
數十名追殺五六十名勦辦甚爲得手該將軍被槍  
子穿帽受傷猶忍痛督兵鏖戰獲勝甚屬可嘉現在

傷痕是否平復朕心實深懸繫著將朕是日所佩之  
大荷包一對小刀一把由驛寄去賞給托明阿並頒  
賞五等祿八兩給假調養該將軍素性勇敢老當益  
壯惟盼醫治速痊以慰朕念明慶打仗多次奮勇出  
力著卽賞還副都統所有該將軍現帶官兵卽令明  
慶暫行統帶趕緊進剿不准稍有延緩並著勝保酌  
派熟悉軍情之大員飭往托明阿軍營幫同明慶相

機調度現在賊竄屯留距潞安甚近似有回竄東南之勢惟數止千餘又似分股旁竄而大股尙在廻北勝保旣由平遙進兵定能嚴扼北路其南路追兵萬勿稍遲恩華現抵何處著勝保再行飛催務令兼程前進南北夾擊庶餘孽得以全數殲擒至翻山敗竄之賊現往何處著查明具奏

同日慧成奏言臣自清江起程於十九日行抵

揚州灣頭途次接雷以誠福濟等來咨知已會  
摺具奏留臣在揚協同防勦臣晤福濟暨接見  
各將弁稱城內逃出難民僉供賊匪米糧將盡  
令奸細送信瓜州分撥匪徒數千護送米船約  
期於八月二十前後江潮旺盛時衝進揚州並  
令揚州賊匪聽三汊河礮號卽行接應仍於各  
門分出賊匪牽掣我師等語諄懇臣卽留灣頭

協同防勦察看情形賊勢窮蹙瓜州近在咫尺  
運米接濟係在意中若聽其衝進城內則克復  
無期且恐清江一帶不免張皇軍情變幻爭於  
頃刻勢不能不先顧揚州急所當急而和州亦  
不可不顧因飭令常清管帶青州官兵八百五  
十名先行馳往扼要堵截至臣所帶之宣化陝  
西兵九百五十名暫行駐紮灣頭聽候調遣奏

上命軍機大臣傳諭琦善陳金綬雷以誠慧成福濟曰  
揚城東北一帶勇多兵少慧成現已行至灣頭著卽  
將所帶之宣化陝西兵九百五十名駐紮該處會同  
雷以誠福濟等相機堵勦其和州堵禦亦關緊要慧  
成飭令常清管帶青州官兵八百餘名先行馳往扼  
要截勦卽飛催前進毋令稍涉遷延至城內賊糧將

盡窮蹙思竄勢所必至該大臣等亟宜妥籌協勦合  
力進攻萬不可再事稽遲致令乘虛竄逸琦善身爲  
總統陳金綬雷以誠均係幫辦慧成福濟督兵協勦  
雖分路禁營而所辦共此一事儘稍存畛域之見不  
能効力同心滅此窮寇無論該逆由何路竄出該大  
臣等均不能辭罪半載以來老師糜餉蕞爾揚城不  
能迅圖克復豈坐待賊匪全竄又復滋蔓他處乃以

收復城池入奏爲謝責地步耶

二十九日辛丑 琦善陳金綬雷以誠福濟奏言揚

城賊匪被圍窮蹙近獲奸細供稱江甯鎮江之

賊欲俟中秋大汛乘船駛入內河會合瓜州之

賊前來援應臣琦善密飭總兵瞿騰龍等於三

汊河添設高椿以阻河路連日埋伏偵探不見

賊船到來城內賊匪待援不至智計益窮臣等

伏念困獸猶鬪更宜加意防維飭令各營分段  
巡防互相策應十九日賊匪百餘人出徐凝門  
至王家莊地方參將師長鑣等督率兵勇前後  
夾擊斃賊二十餘人餘賊奔竄入城二十日又  
有賊匪三百餘人出徐凝門至王家莊師長鑣  
等分路迎剿適參將馮景尼率兵勇一千名在  
田家巷埋伏聞警踵至追至浮橋口斃賊數十

名城上賊匪望見飛速鳴金該匪等悉遁入城  
中是日西門迤南有賊匪縋下約二百餘名參  
將鞠殿華等督兵迎擊那瑪善等帶隊接應復  
經臣陳金綏督飭守備馬國陞等直前迎敵共  
斃賊百餘人其時仙鶴嗉迤東亦有賊四五十  
名下城經都司色普哲訥等督飭弁兵傷斃賊  
匪二十餘名臣等察賊情形實屬畏怯惟恃城

堅人衆固守望援如果糧食垂盡斷無坐以待  
斃之理勢必傾巢出竄冒死突圍現在惟有杜  
絕外援嚴防竄逸以冀相機克復奏入

上諭曰東路欲竄早在意中琦善斷不能辭責自賽尙  
阿一誤之後再誤者琦善也琦善老而無志如再不  
知愧奮朕必用從前賜賽尙阿之遏必隆刀將汝正  
法

三十日壬寅恩華奏言臣於十五日自濟源移營  
赴晉會剿途次接奉

諭旨令由垣曲一路進兵直赴平陽洪洞攻剿遵卽督  
催兵弁前進二十四日至長子縣晤托明阿據  
稱賊匪竄至縣屬鮑店地方曾經接仗該逆復  
竄往潞城明慶西凌阿現已帶兵跟蹤追剿並  
據探稱賊復由潞城東竄黎城查黎城與豫省

武安直隸邢臺接界現直隸各營之兵大半調  
撥在外存營不過十之三四畿疆重地所關甚  
鉅計此時總應繞越賊前迎頭截擊遏其北竄  
因詳詢該處熟悉道路之人卽由固關徑入直  
隸一面確探賊蹤迎頭截擊惟臣現帶馬步官  
兵一千六百餘名勢覺稍單業經移咨勝保撥  
派兵弁迎頭會勦以期迅殄賊氛奏入報

同日郭夢齡奏言賊匪自岳陽沁源兩縣山路竄入長子縣境二十日經托明阿等截擊獲勝旋據潞安府知府金昀善稟報二十二日賊奔潞城圍攻托明阿同侍衛蘊秀等各帶官兵緊追現探賊匪於二十三日攻陷潞城全數奔竄黎城欲由該處出口徑撲豫境潞城文武現

尙不知下落等語臣不勝焦灼當卽飛咨訥爾  
經額陸應穀趕緊撥兵截擊以期迅速殲滅無  
任蔓延奏八

上諭曰該逆奔而不留其勢固窮雖欲竄往河南而太  
原前路防堵尤屬緊要不可稍疏潞城文武下落著  
查明具奏恆春指日抵晉郭夢齡仍應和衷籌畫以  
大局爲要若遇要件不及相商卽徑行馳奏

上命軍機大臣傳諭勝保曰賊匪攻陷潞城全數奔竄  
黎城欲由該處出口徑撲河南黎城與河南武安直  
隸邢臺皆屬接界托明阿西凌阿明慶蘊秀等據稱  
帶兵緊追何以未能堵截致賊旁竄此時勝保是否  
仍在平遙抑係督兵進剿未據奏報實深懸繫恩華  
行抵襄垣擬由固關徑入直隸迎頭截擊是否不至  
紓迴遲誤著勝保迅卽統籌全局應如何扼要堵擊

不令竄入直境並合力夾擊之處相機調度辦理賊匪  
勢剽疾勝保等統兵遏其北竄太原之路安知賊匪  
不避實襲虛橫出山口由豫境擾及直隸境內著該  
大臣隨時飛咨訥爾經額並嚴飭派守隘口官兵認  
真堵截毋稍大意

同日舒興阿奏言查逆匪攻陷平陽復竄洪洞  
與汾河相近有由汾河乘船西竄蒲州之謠現

在蒲州極爲喫緊臣酌量情形自應移緩就急  
馳往蒲州就近堵勦惟逆匪雖竄山西而零星  
股匪四散奔突者不少屢次擊獲多名是陝西  
之會興鎮仍關緊要現派署遊擊成桂等帶兵  
駐守並令河陝汝道恆山督防仍嚴飭地方文  
武一體認真稽查以防偷渡至山西芮城平陸  
永濟等處北岸船隻前經臣派委員弁概提南

岸復移咨提臣就近委員稽查夏陽等渡船隻  
不准鬆懈並飛咨山西撫臣哈芬及徑札汾州  
府迅將汾河兩岸船隻一律撤收臣於二十七  
日帶領官兵七百餘員名自陝州渡河由平陸  
之茅津渡前進取道聞喜馳赴蒲州相機督辦  
惟臣營兵數過少現在孟津渡口似覺稍緩擬  
將前派之官兵一千名內酌撤五百名隨營調

三  
遺該處留兵五百名並河南府所募練勇及兵役等共計約有千名似可藉資巡緝一面移咨河南撫臣飭屬嚴防並遵

旨仍將珠克登留駐孟津以資督率前准訥爾經額咨稱北岸已派兵一千名駐守兩相稽查庶可不至疏虞奏入

上命軍機大臣傳諭舒興阿曰昨據托明阿奏賊匪竄

八長子縣境數止千餘其大股現在屯聚何處尙未  
據勝保奏到惟逆匪由洪洞分竄難保不由黃河西  
擾蒲州陝省防範不可不嚴該督帶兵前進既可迎  
勦分竄之賊又可扼守陝省門戶所有山西沿途地  
方官員如有延玩誤差者著卽據實嚴叅懲辦並著  
隨時知會勝保郭夢齡務當聲息相通合力夾擊迅  
殄逆氛

欽定勦平粵匪方略卷五十七 癸丑年

九月初一日癸卯勝保奏言臣因逆賊覬覦北路

將山西調到兵一千餘名扼要布置一面督兵

前進當賊未東竄時卽飛催恩華托明阿等由

潞澤一帶迎擊會勦扼其東竄旋經托明阿咨

稱已由澤州前進而恩華行抵何處未據覆到

臣卽督兵由子洪口南關前進欲與托明阿聲

勢相聯詎該逆聞我兵將至乘閒向東奔竄托明阿在長子縣屬之鮑店地方遇賊接仗擊退數里旋復奔突東竄由屯留縣城外竄至潞城黎城一帶潞城失守卽已收復托明阿已帶兵尾追西凌阿亦跟蹤前進臣本擬將該逆困於沁源山中全賴東南之兵截住庶可四面齊進一鼓殲除無如賊奔太急各路進兵較緩臣由

垣曲至洪洞路經千餘里追勦半月有餘使恩  
華所帶馬步隊與托明阿相合必可得力乃緩  
不濟急董占元亦至今未到訥爾經額此時恐  
亦未趕到正定臣若再尾追更恐不及現已由  
南關折回太谷帶兵二千餘名直趨正定獲鹿  
井陘一帶以扼北竄賊鋒保衛畿輔並飛調舒  
興阿派來之副都統綿洵前任總兵桂齡帶領

官兵一千八百名並副將孔廣順所帶官兵九  
百名隨同勦辦復於臣所帶馬隊二百餘名內  
撥出一百五十名派營總巴揚阿由北路迎頭  
抄擊一面飛咨直隸督臣山東撫臣嚴防以便  
跟蹤夾擊一面飛催恩華迅速由清化前進保  
護彰衛一帶更請

飭下於保定南北添兵嚴密布置庶期有備無患至恩

華托明阿一則會勦遷延一則堵禦未善應請  
旨交部分別議處臣督催不力以致徵調未齊請  
旨一併交部議處

同日諭爾經額奏言探得西竄餘逆分股擾及  
晉省潞澤並由潞澤竄至豫省涉縣武安縣復  
由武安山路徑奔臨洺關查調駐臨洺之吉林  
兵一千名因豫省車輛不敷周轉已到防者七

百五十名且軍火器械尙未運齊當又截留折  
回之山西兵三百名飭令總兵經文岱統帶迎  
擊該逆拏死抗拒我兵奮力轟擊斃賊百數十  
人並斬獲紅巾賊目首級一顆生擒長髮賊匪  
一名該逆稍退我兵續有斬殺無如山徑可通  
之路不一而足且該逆到處裏脅愈聚愈多我  
兵不滿千名寡不敵衆致有傷亡臣現在暫駐

廣平府城催調官兵並擬卽日帶兵由南和冀  
州無極一帶繞道抄出賊前馳赴正定堵勦一  
面飛咨署提臣保恆由固關帶兵迎勦至臣子  
蘊秀偕同副將伊綿阿等前在清化帶兵一千  
名由澤州小路取道前赴平定并陘一帶駐防  
此時署提臣帶兵迎擊則固關空虛現已飛飭  
蘊秀等卽在固關駐紮堵禦並飛咨桂良嚴防

省會請將現在

南苑之察哈爾兵四千名調赴正定堵勦其現駐天津之

盛京兵二千名調駐保定防堵

訥爾經額又奏言賊由太行各小口竄入直境  
太行以東府縣多在平地無隘可守應添兵分  
勦以期及早撲滅臣思

欽差大臣勝保現在督兵駐紮太原臣已咨商勝保  
體察晉省情形酌留官兵防勦一面親督官兵  
星夜由井陘獲鹿徑赴正定迎頭截擊應請

飭下該大臣勝保遵照再賊匪已至廣平地面臣現駐  
廣平飛催各路已調未到之兵稍有成數卽開  
仗迎勦

同日桂良奏言臨洺關被賊竄踞現探賊已北

來距順德城不過二十里據訥爾經額咨請添  
兵堵截前來查省城官兵僅有四百餘名滿營  
駐防官兵亦止五百餘名均無可撥況臨洺關  
距省不過六百餘里畿輔重地爲都城保障亟  
宜準備斷難分兵前往惟查由省撤回之大同  
後起官兵五百名尙未出關現在速飭改道徑  
赴順德迎剿並將龍王廟水次停泊之

盛京吉林官兵飛咨該督就近飭調並飛咨勝保  
迅速帶兵來直跟蹤勦辦一面知照慶祺將駐  
紫天津之

盛京兵分撥一千來省但恐行走較遲應懇

天恩先行撥給京營精兵五六千名隨帶礮位迅速前  
來一面保衛省垣一面策應前路方可無虞惟  
省城礮位不敷防堵聞副都統佟鑑管帶赴晉

礮位已於二十九日由京起程擬俟該副都統  
到省時幫同防堵並將所帶礮位暫行截留以  
資急用均奏入

上命軍機大臣傳諭勝保恩華托明阿西凌阿曰臨洛  
關被賊占踞距直隸省城甚近勝保素稱勇敢且畀  
以總統重任各路官兵均歸調度著卽迅由井陘一  
路出山迎截並飛催各路統兵大員迅速會勦總期

近畿地方及早肅清以慰廑念前據恩華奏報亦擬  
帶兵由固關一路迎截此時不知行抵何處是否已  
與勝保會合著卽速催前進會同辦理托明阿著與  
西凌阿等併力追擊使賊匪前後受敵無難悉數殲  
除董占元畏葸不前至今屢催未到著卽查明如係  
有心貽誤卽奏請正法以肅軍律現派培成多爾濟  
那木凱帶領察哈爾官兵四千名前往正定惟馬匹

尙須調撥此項官兵恐未能剋期趕到其盛京兵二  
千名由天津馳赴保定如有應需調遣之處卽行咨  
調協勦恆春已令暫留正定協同帶兵防勦並將副  
都統佟鑑所帶礮位截留著卽酌量布置滹沱河渡  
口船隻亦須飭令收集毋令奸匪偷渡畿疆重地豈  
容逆匪滋擾該大臣惟當申明紀律嚴定賞罰與在  
事諸臣同心勦力迅殄妖氛

上又命軍機大臣傳諭訥爾經額曰據奏賊竄直境情形已派培成多爾濟那木凱慶祺維祿分帶察哈爾盛京各路官兵星馳赴勦矣自賊竄懷慶時節次諭令該督嚴防畿輔要隘何以賊雖竄及一戰卽潰且軍火器械爲兵丁衛身擊賊之具自賊匪西竄該督漫無布置竟置軍械於後致令如此勁旅徒手禦賊事後歸咎車輛不敷亦已無及該督調度無方已可

概見本日據桂良奏逆匪已踞臨洺關且離順德不過二十餘里該督旣在永年發摺何以並未提及臨洺關失守之事摺內又稱擬由南和冀州無極一帶繞出賊前廣平至正定自宜徑向北行何以轉折而東似此紓折遷延是何意見豈將任賊直奔正定乃由冀州一帶爲退回省城計耶保恆帶兵由固關出山迎擊自係正辦蘊秀伊綿阿何以轉令留紮固關

不與保恆合力勦賊勝保等現已由獲鹿井陘督兵  
迎擊該督務卽迅赴正定與勝保等會勦勿再延誤  
滹沱河現當盛漲有險可守著飭地方官收集渡船  
毋爲賊用所有派赴正定之察哈爾官兵卽日由京  
起程該督不可專待此項兵丁致有貽誤其派赴保  
定之盛京官兵著與桂良妥商布置並嚴飭地方文  
武合力守禦儻再有疏失惟該督是問逆匪肆意奔

突難保不由磁州一帶回竄豫境懷慶府知府余炳  
薦已補授陝西鳳邠道該員熟悉河北情形著飭暫  
留懷慶會同河北鎮道籌辦防堵其山東與直隸交  
界處所亦卽飛咨瑞昌崇恩一體嚴防以杜竄逸本  
日又諭令華山泰就近飭令多倫諾爾廳購馬二千  
匹著該督飛催日比道飭該廳趕緊購辦毋稍遲誤  
上又命軍機大臣傳諭桂良曰臨洺關已被賊踞畿疆

噶緊已有旨將駐紮南苑之察哈爾兵四千名派培  
成多爾濟那木凱帶赴正定迎勦又派慶祺維祿管  
帶駐紮天津之盛京兵二千名星速馳赴保定以資  
省垣防守並備各處隨時偵探盤緝奸宄密速查拏總以  
籌防並飭各處隨時偵探盤緝奸宄密速查拏總以  
鎮定人心爲要至勝保統領大兵已由固關直趨獲  
鹿一帶截勦訥爾經額前赴正定繞由冀州行走恐

有遲誤現已諭恆春暫留正定佟鑑所帶礮位著卽  
與恆春佟鑑商酌應運赴何處備用切勿拘泥滹沱  
河盛漲有險可守著飭地方官將船隻盡行收集毋  
令賊匪偷渡並知會恆春一體嚴防

上又命軍機大臣傳諭舒興阿曰賊匪由洪洞竄出因  
勝保帶兵遏其前竄太原之路遂由潞城黎城一帶  
山徑竄入直境占踞臨洺關現在勝保由固關一路

出山直趨正定各路大兵雲集當可杜其北竄舒興  
阿已親督兵弁過河駐紮蒲州著卽酌度情形如晉  
陝之間不甚喫重卽行前進探明賊蹤應由何路督  
兵夾擊總以廓清直境迅掃逆氛爲要舒興阿現已  
出境桂明係提督全省軍務責無旁貸著舒興阿飛  
咨該提督並張祥河嚴密堵禦盤詰奸匪勿令匪蹤  
闖入新授鳳邠道余炳燉前在懷慶守禦得力已諭

諱爾經額飭該道暫留懷慶會同鎮道文武嚴防矣  
上又命軍機大臣傳諭恆春曰逆匪竄踞臨洺關訥爾  
經額退至廣平府畿輔情形喫重恆春著暫駐正定  
府督率該處防兵相機布置俟勝保到後再行奏明  
赴晉據桂良奏現留副都統佟鑑協同防守省城並  
截留職位著該撫體察情形如須將職位運至正定  
以備攻勦卽行知照桂良妥速辦理頒給勝保之神

雀刀卽著派員先行齎交該大臣祗領勿稍遲誤

上又命軍機大臣傳諭郭夢齡曰賊匪由晉竄至直隸

臨洛關已被賊踞現經降旨令勝保恩華善祿等由

井陘出正定繞出賊前悉力兜擊並諭令恆春暫駐

正定協同勦辦現在逆匪雖竄出晉境一經大兵截

擊難保不復圖回竄恆春一時未能赴任該署撫務

於毗連直豫各要隘嚴密設防並搜除境內餘匪飭

令各地方官勸諭紳耆力行團練互相保衛其被擾  
各地方尤宜慎簡賢員設法安輯再京餉需用緊急  
現經部撥之山西藩庫銀三十萬兩省北捐輸銀十  
萬兩並鹽庫現存銀五萬兩務須移緩就急卽日派  
員解京以備支放正定現有重兵即可由此路行走  
如有阻滯卽繞道趕解萬勿遲誤

上又命軍機大臣傳諭毓書曰本日派令培成多爾濟

那木凱帶領南苑駐紮之察哈爾官兵四千名馳赴  
正定協勦惟現存馬匹不敷著毓書飭令總管那敷  
德將現在哨內牧放之錫林郭勒馬三千匹星速派  
員解京備調萬勿遲誤

上又命軍機大臣傳諭華山泰曰本日派令培成多爾  
濟那木凱帶領南苑駐紮之察哈爾官兵四千名馳  
赴正定協勦惟現存馬匹不敷著華山泰就近行知

日北道轉飭該管之多倫諾爾廳迅速購買膘壯馬  
二千匹並著華山泰派員將此項馬匹迅卽分起押  
送來京以備調用

上諭內閣曰逆匪自山西洪洞東竄復由屯留竄至潞  
城黎城一帶經勝保善祿托明阿西凌阿等分路追  
截勝保已將賊匪北竄太原之路扼要堵截托明阿  
由澤潞進兵復於屯留境內追及賊蹤亦獲勝仗將

該匪擊退數里旋復奔突東竄而恩華赴晉迎截之  
兵迄未與賊一遇以致該逆徑由涉縣武安竄入臨  
洺踞關抗拒畿輔重地豈容逆匪竄擾現在各省防  
兵及盛京吉林官兵雲集已敷勦辦著再添派培成  
多爾濟那木凱管帶駐紮南苑之察哈爾馬隊官兵  
卽日起程並派慶祺維祿管帶駐紮天津之盛京官  
兵迅速馳往併力奮勦前曾疊次諭令訥爾經額嚴

防直隸各要隘據奏早經布置何以先期絕無偵探  
準備以致賊匪竄入直境該督調度乖方實難辭咎  
訥爾經額著革職留任並拔去花翎以示薄懲恩華  
會勦遷延致賊東竄著革職留任仍責令帶兵迅速  
繞出賊前會同勝保協力勦辦以贖前愆托明阿勦  
賊奮勇惟未能遏其竄逸著降五級留任勝保督催  
不力咎亦難辭著降二級留任均著迅速會勦殄此

羣兇肅清畿甸如帶兵大員及鎮將以下各員弁再  
有逗留不進致誤事機者卽著該大臣懔遵前旨嚴  
參懲辦

初二日甲辰查文經奏言臣就江南形勢統籌大  
局謹酌擬數條恭呈

御覽一東西梁山宜駐重兵並速募戰艦也查江南安  
徽八十三營安徽向無水師江南水師汎地亦

至高資營所轄而止查高資營上至江甯百餘里下距鎮江三十里江甯鎮江失守水師星散大江已爲賊有賊可至安徽至江西即可至湖北至四川查由江甯溯流而上一百四十里至東西梁山江面至此一束若將兩岸安設大礮各駐重兵據險扼守再由湖北安徽廣募民船載以精兵配設大小礮位遇有賊船隨時截擊

使水陸不能偷渡則金陵賊匪直釜底魚耳此時三城賊匪僅圖固守尙無鬪志久則恐有他變似宜急爲布置一請奪回五龍山北固山等處礮臺也查江甯省城迤下六十里五龍山並對岸沙洲圩各築有礮臺一所又鎮江焦山迤上之象山北固山暨對岸之順江上下共設有礮隄四所均安設大小礮位三城失守兩地礮

臺想已盡爲賊有兵船上攻揚州則恐爲北固  
山象山之礮所擊上攻江甯則恐爲五龍山沙  
洲圩之礮臺所阻兩處礮臺不先奪回兵船必  
難飛渡兵船不到僅攻其陸路三面是賊之接  
應不斷而長江來往自如陸路弁兵望洋而已  
擬請分撥大隊精兵由閒道前進奪取兩路礮  
臺守以重兵俾兵船得越象山北固山而上進

據瓜州鎮江兩口門使鎮江揚州賊營消息不與金陵相通則金陵內援絕矣金陵之賊不使越五龍山而下瓜儀之賊不越五龍山而上則揚州鎮江外援絕矣加以東西梁山扼守上游賊匪進退無路金陵已成孤注自然瓦解一練勇宜區別也大江以北惟徐州壽州等處人情勇悍樂於戰鬪大江以南暨江北淮揚等處民

情荏弱而不尙義氣便巧而實少機謀族鄰姻姪多陷賊窟易被匪黨勾結此等練勇似宜少用至添弟會又名小刀會閩粵湖廣江西愚氓多有被誘入會者其會實與賊通似此數處練勇亦宜慎用竊維軍營不得已而用勇其應募來者非漏網之匪卽游手之徒各立黨與互相傾軋有此營埋伏而彼營明張旗幟呐喊放槍

以授賊耳目者有前隊接仗而後隊含沙以射  
者尋常如此破城之日勢必劫取金銀搶掠子  
女各自殘殺因而坐失事機其弊將不可復問  
似宜添兵裁勇其有擾亂掣肘者照軍法從事  
庶畛域化而勇皆可用矣以上管窺所及冒昧  
直陳伏祈

聖鑒奏入

上命軍機大臣傳諭琦善陳金綬雷以誠慧成福濟向  
榮怡良許乃釗李嘉端曰據查文經奏統籌江南大  
局一摺所奏甚是其速募戰船一條尤爲肅清江面  
要著前經疊諭湖北湖南各督撫趕緊製造嗣經該  
省奏稱民船不適於用業已收買江船照廣東船式  
改造可安礮位而利遄行著卽迅催張亮基等派委  
得力員弁雇募柁丁水手駛赴江南以資攻勦廣東

所募紅單船早抵閩洋此時當可入日又有知縣林  
德泉所雇拖罟船現泊上海均著飛催前進萬勿刻  
遲逆匪於江岸偏設礮臺致我兵船不能前進該臬  
司所請攻奪五龍山北固山象山沙洲圩等處礮臺  
並扼守東西梁山實爲安排水戰之急務尤宜及早  
圖維先奪礮臺而後戰艦得以暢行無阻其區別練  
勇一條亦切中募勇情弊著該大臣督撫等體察情

形迅速籌辦庶不致坐耗時日糜餉老師也

同日

上命軍機大臣傳諭僧格林沁德勒克色楞特興額多爾濟那木凱培成曰昨有旨令培成多爾濟那木凱帶領駐紮南苑之察哈爾官兵馳赴正定一帶協同防勦著僧格林沁等挑選得力精兵二千名飭令迅速分起前進

上又命軍機大臣傳諭桂良諭爾經額翁心存宗元醇  
曰昨有旨命培成多爾濟那木凱管帶察哈爾馬隊  
官兵二千名馳赴正定一帶防勦本日復命達洪阿  
挑選八旗精兵二千名管帶起程前往臨洛關一帶  
協同剿賊該官兵等卽日出京必須迅速兼程前進  
所有沿途需用車輜等項不可稍有遲誤著桂良等  
卽飭地方各官趕緊豫備以利軍行如有藉詞推諉

遲誤者卽著查明叅辦

上諭內閣曰昨因逆匪竄越直隸交界降旨令各路統兵大員帶領官兵分路進剿復派培成多爾濟那木凱管帶駐紮南苑之察哈爾馬隊官兵慶祺維祿管帶駐紮天津之盛京官兵前往協勦著再添派副都統右翼總兵達洪阿挑選八旗精兵馳赴臨洺關等處併力勦捕以上各官兵均著聽候欽差大臣勝保

調度

初三日乙署山西巡撫布政使郭夢齡奏言據

潞安府知府金昀善稟稱會同署潞澤營參將

富隆阿督率兵勇馳赴潞城追勦逆匪已竄黎

城當將潞城收復文武員弁尙無下落仍帶兵

勇躡蹤追勦途次探報黎城於八月二十四日

被陷賊由黎城竄往河南涉縣臣查涉縣偏近

直隸邯鄲與山西遼州毗連當經飛咨直隸河  
南山東各督撫迅速派兵截擊如三省俱有重  
兵防勦該逆勢必竄回遼州復飛催直隸折回  
之大同鎮官兵趕赴遼州相機防勦以杜逆匪  
回竄于洪地方爲潞澤遼各府州進省總路仍  
留副將孔廣順帶兵一千三百名照前嚴防臣  
規署撫篆未能先事豫籌以致潞城黎城失守

署臬司冀甯道郭用賓專駐潞澤一帶防勦不  
能力遏賊氛潞安府知府金駒善雖經帶兵追  
勦收復潞城究係所屬失守均有應得之咎請  
旨將臣等交部分別議處奏入得  
旨郭夢齡等均著議處

同日

上命軍機大臣傳諭向榮許乃釗曰廣東所募紅單船

早抵閩洋此時當可入江此項船隻是否堅固礮位  
是否猛利管帶各員是否得力著該大臣等認真體  
察總期有一船可得一船之用並著剴切曉諭如將  
江面賊船轟燬除軍械火藥米糧照例入官外其餘  
財物概行賞給以期奮力勦賊早清江面

上又命軍機大臣傳諭葉名琛柏貴曰前募之紅單船  
早已馳抵閩洋其快蟹船隻亦經諭令雇備該督撫

等諒已遵旨辦理著卽派委明幹賢員將前項船隻  
擇其船堅礮利者再行設法雇募多隻並選派勇敢  
紳士令其管帶迅速赴金陵會同協勦如能將江南  
賊船全行轟燬卽賞以數十萬金亦所不吝該督撫  
等卽酌量妥速辦理毋稍延緩

初四日丙午桂良奏言據報賊匪擾及隆平柏鄉

等縣於八月三十九月初一等日相繼失守正

定郡城喫緊除飛催慶祺等迅速帶兵來省外  
所有察哈爾官兵應請

旨迅飭帶兵官星夜前來以資防勦至冬鑑所帶職位  
探聞該副都統卽日到省如前路緊急卽將職位  
留於省城並留該副都統幫同防守奏入

上命軍機大臣傳諭桂良曰逆匪竄陷隆平柏鄉勢甚  
剽疾正定情形極爲喫重已有旨催令勝保迅速前

進該大臣計日可抵正定若能繞出賊前截勦定可得手慶祺等所帶駐紮天津之盛京兵二千名已於初三日由水路起程前赴保定其察哈爾官兵並派出京兵亦卽日前往協勦所有撤回之大同兵及龍王廟停泊之盛京官兵並吉林官兵均飛催趕到佟鑑所帶礮位如已到省著查看緩急與恆春酌量布置隨時知照勝保合力勦辦前調大凌河哲里木錫

林郭勒等處馬匹聞已入山海關卽行飛催前進勿  
令稽延

上又命軍機大臣傳諭勝保曰隆平柏鄉縣城均已失  
守正定防守甚爲喫緊現派培成多爾濟那木凱帶  
領京兵五百名並察哈爾官兵二千名並派達洪阿  
帶領京兵二千名前往均歸勝保調度第恐未能剋  
期趕到該大臣務卽督兵迅速前進扼守正定滹沱

要隘毋稍遲緩本日已將訥爾經額革職授桂良爲直隸總督一切防守事宜仍著隨時知會桂良妥籌辦理該大臣等其協力同心肅清逆匪保衛畿疆是爲至要

上又命軍機大臣傳諭恆春曰賊匪由臨洺關竄至隆平柏鄉等縣相繼失守逼近畿疆甚關緊要該撫諒已馳抵正定著卽督率地方文武扼守滹沱保護郡

城遏賊北竄之路仍須嚴密偵探毋任奸細溷入城  
中桂良駐紮省城如有緊急咨照不及卽行相機調  
度萬勿拘泥勝保此時若已由獲鹿出山繞出賊前  
攻剿定可得手至佟鑑所帶職位據桂良奏截留保  
定以資防守並著該撫酌量緩急與桂良妥商辦理  
上又命軍機大臣傳諭舒興阿曰賊匪由臨洺關竄至  
隆平柏鄉二縣該處逼近正定畿疆重地甚關緊要

該督現在山西蒲州一帶防勦著卽統兵迅速前進  
現在勝保等從山西繞出正定卽日可到該匪經大  
兵夾擊勢必紛竄著該督沿途偵探何處緊要卽馳  
往何處督勦如近畿地方情形喫重著卽督兵應援  
毋稍遲延

上諭內閣曰前因逆匪竄入山西訥爾經額折回直隸  
疊次諭令將各路要隘嚴密防守乃賊匪竟由山西

竄入直隸境內占踞臨洺關該督退至廣平數日以來並無續奏本日據尙書桂良奏賊匪擾及隆平柏鄉等縣正定郡城喫緊催調官兵堵截等語該督久任畿疆一遇軍務漫無布置辜恩溺職咎實難辭訥爾經額著卽革職仍留於直隸隨同桂良辦理防勦事宜直隸總督著桂良補授務卽悉心籌畫與勝保等調派將弁兵勇迅速截勦殄滅賊氛以副委任

同日張芾奏言粵逆攻撲江西省城九十餘日  
臣等委員會同紳士將倡議餽賊及乘機搶掠  
之土匪次第擊獲正法連日飭將二三千斤大  
礮十餘位分布章江得勝二門緊對賊壘晝夜  
轟擊擊沈賊船二三十隻獲犯供稱連日殲斃  
賊匪二三百人該逆難以棲身似有遁意八月  
二十二等日臣等派令右營兵勇分路攻撲

賊營該逆仍伏匿不出槍礮如雨我軍撲近牆  
根拋擲火彈火罐每日燒斃賊匪約數十人二  
十二日夜賊營槍礮猶向城內轟擊我兵齊放  
大礮賊礮頓止兵勇乘勢下城放火時值南風  
大作延燒甚熾賊衆紛紛上船揚帆下竄燒斃  
溺斃之賊不計其數生擒八十餘名殺斃一百  
餘名奪獲船十二隻礮三尊擡槍十三桿我軍

苦無舟楫不能順流尾追現已派令都司戴文  
蘭等帶兵兼程繞出賊前沿途截擊江忠源與  
總兵音德布等亦卽分起跟蹤前進如賊於出  
湖後上竄卽於九江一帶堵勦如賊仍回竄江  
南安徽仍咨各該督撫加意嚴防江西省城固  
守九十餘日仰賴

聖主福庇得以保此危城所有在事始終出力各員容

臣等查明具奏願請

恩施以昭激勸

同日江忠源奏言賊匪乘風下竄臣應卽星夜  
跟蹤追勦奈江省自被賊擾近省民船非先行  
逃匿卽爲賊擄掠一時實難雇覓而賊一出湖  
口上可窺伺湖北下可竄擾安徽並可歸併金  
陵下游查無陸路可以繞赴賊前惟上游之九

江府及田家鎮等處尙可從建昌一帶迎勦臣等商派都司戴文蘭等帶辰州兵開化勇楚勇廣勇二千餘名卽日起程從陸路趕至九江臣一面確探賊蹤一面設法雇覓船隻帶領雲南湖南官兵湘勇楚勇由水陸尾追如賊果上竄卽與戴文蘭等前後夾擊若該逆順流而下卽令戴文蘭等由九江雇船駛下與臣等合隊追

入皖境探明賊蹤相機堵勦儻竟歸金陵則臣  
或仍遵前

旨馳赴河南或徑赴金陵到皖時當可奉到

諭旨再行欽遵妥辦

同日李嘉端奏言據前臬司張熙宇稟稱八月  
二十二夜閒至次日午閒賊船六百餘隻陸續  
停泊安慶城外乘夜進城不許百姓逃避復至

北門外各村莊搶擄人畜黃花亭馬山兩處皆築土城又於準提庵築土牆截斷大路北門城樓安置槍礮各城添築望樓城垣增高五尺匪衆約五六千人意圖占踞安慶若非厚集兵力迅速殲除恐將爲北竄之繼集賢關防守萬不可虛僅有前援廬江之練勇六百名可以派往救應恆興所帶陝兵五百名亦可撥往而廬郡

已無一兵但恃鄉勇守禦前次琦善所撥慧成之兵除宣化鎮兵五百業經臣商調協守東關其隊兵四百五十名亦擬商調併交恆興管帶以資堵禦慧成卽帶青州馬隊千名駐守和州其關山一路咨商奕經由固鎮進守復咨商周天爵帶其派往潁州勦匪之兵來桐懷擇要進勦並咨尙書恩華將自皖帶去各兵仍帶來廬

另派兵駐守徐宿刻下懷慶解圍餘賊勦洗殆盡且計江西賊船諒已去盡從前奉

命防堵皖豫交界之江忠源自應仍遵

前旨追勦來皖亦經臣咨明張芾查照飭遵並咨張亮基向榮速撥船礮令上下游並進知照陸路合力痛勦或不難於埽蕩現惟當力守集賢關未敢輕言攻擊請

飭下各路帶兵大臣速卽應援俾全皖危而復安則臣  
民幸甚

李嘉端又奏言山東直隸陝西官兵共一千九  
百五十名由慧成帶赴和州一帶堵勦本日接  
慧成來咨經漕臣福濟奏留此項官兵會攻揚  
城等因現在皖省萬分喫緊相應請

旨仍令慧成統帶各兵星夜來皖以資應援至前次留

皖之固原兵六百五十名西安兵五百名經勝  
保帶赴河南追勦今懷慶解圍並請

旨飭下勝保仍將帶去前項官兵刻日統領來皖以期  
勦滅淨盡均奏入

上命軍機大臣傳諭張芾江忠源曰逆匪敗竄南昌解  
圍而皖省有賊船六百餘隻停泊安慶府城外乘夜  
入城此股逆匪顯係圍攻南昌不能得手復圖竄踞

安慶已諭令李嘉端周天爵迅圖籌辦並諭令張亮基崇綸將造備船隻駛赴下游交江忠源調遣其夏廷樾所造船隻並著派員押送下游以備兵勇乘坐現在南昌省城解圍所有破難居民著張芾等妥爲招撫仍著江忠源跟蹤追勦卽與都司戴文蘭李輔朝等督飭兵勇直赴皖省探明賊蹤合力攻擊勿令餘逆久踞皖城又成巢窟

上又命軍機大臣傳諭周天爵李嘉端曰現在懷慶餘匪由山西竄入河南直隸交界勝保帶兵進剿保衛畿疆勢難令赴皖省本日據張芾奏江西省城業已解圍賊匪乘風下竄已派都司戴文蘭等帶領兵勇由陸路跟追如該逆順流而下卽令該都司等由九江雇船合隊追剿江忠源亦卽前往等語安慶賊船是否由江西紛竄現在匪徒五六千人築壘空濠已

有占踞之勢必當早圖攻勦已命張芾將江西新造  
戰船由江赴皖備調並命張亮基等將備赴江南船  
礮酌撥往援該撫務卽嚴飭玉山張熙宇等扼守集  
賢關防其北竄安徽現無重兵惟周天爵在潁州勦  
匪著迅撥兵勇由桐懷一路擇要進剿並可保護廬  
州仍飛咨江忠源無論水陸迅速赴援慧成前由揚  
州分撥青州官兵八百五十名派常清管帶馳赴和

州計日趕到亦可酌量調撥奕經現守固鎮能否進  
守關山一路著李嘉端與奕經周天爵咨商辦理

上又命軍機大臣傳諭張亮基崇綸曰江西擊退之賊  
非上竄湖北卽全數下擾安慶江忠源雖已跟蹤追  
剿而苦無船隻恐剿辦未易得手張亮基等前奏籌  
備船艦如尙辦不足數卽著將業經改造若干隻先  
委得力員弁管帶星速駛赴下游聽候江忠源調遣

協同截勦

上諭內閣曰逆匪攻撲江西省城九十餘日經張芾陳孚恩江忠源等督率文武官紳兵民同心協力嬰城固守雖未能勦盡賊匪而城圍已解省會得以保全自應先沛恩施以昭獎勵張芾著開復革職留任處分陳孚恩著賞戴花翎江忠源著賞給二品頂戴其在事出力文武員弁及紳民兵勇人等著查明據實

保奏候朕恩施

同日倉場侍郎慶祺奏言駐紮天津之

盛京官兵已傳知帶兵協領綽勒霍倫特普欽趕  
緊束裝以備起程臣擬由天津帶兵先至保定  
省城探聽賊勢迎頭截擊惟由陸路行走沿途  
積水尙深繞道必致耽延查駐津官兵前因運  
河漫溢無處紮營均在原船住守現擬卽用原

船徑赴省城分作四起自初三日始每日以五百名爲率接續前進計初六日官兵二千名可以全數起程臣卽於是日督催趨行統俟至省另換車馬前赴臨洺關迎頭會勦再天津存有五百斤銅礮六十尊臣擬帶二十尊並礮手兵五十名派令署遊擊冷慶署千總馮雲彪管帶同臣前往以備調度奏入報

初五日丁未直隸總督桂良奏言據報賊匪已至

趙州臣卽飛札署提督保恆實力防堵並正定

鎮府於滹沱河渡口多派兵役晝夜把守現在

船隻已收北岸恐賊紮筏偷渡復飭於沿河安

設擡槍擡礮遇賊渡河卽行轟擊惟趙州距省

較近勝保所帶官兵尙無入直信息應請

旨催令察哈爾馬隊裹糧星夜兼程前進以資迎勦奏

八

上命軍機大臣傳諭桂良曰桂良已授爲直隸總督本省各路防兵均可調遣所有訥爾經額管帶各官兵現在何處該督卽飛催調撥扼要堵截並嚴飭保恆實力防守正定該郡爲保定門戶萬不可令賊匪闖入務於滹沱河口派委得力大員督率弁兵不分晝

夜竭力巡防該處船隻無多易於收藏淨盡惟須嚴  
查兩岸居民接濟賊匪竹木等物致令紮筏偷渡所  
留省垣之佟鑑帶往職位應否移往該處交恆春保  
恆派撥應用著該督酌量妥辦本日已飛諭勝保兼  
程前進計該大臣必可趕入直境杜賊北竄慶祺統  
帶盛京官兵二千名已於初三日自天津陸續起程  
培成等所帶察哈爾兵及京兵共二千五百名與達

洪阿所帶八旗官兵二千名均已諭令迅速起程至  
省城地方尤屬緊要藩司張集馨現在駐紮何處何  
以賊匪由河南竄入直境未見該司督兵堵截省城  
藩臬皆係署任張集馨豈可置之空閒之地著該督  
查明飭令該司星馳回省協同辦理防勦至河間府  
一帶亦係通衢著該督一併飭屬設防並通飭所屬  
曉諭紳民認真團練互相保衛以靖地方

上又命軍機大臣傳諭勝保曰賊匪已至趙州逼近正定若不趕緊截剿則近畿一帶俱爲震動該大臣由井陘出山迎截現在行抵何處連日未據奏報朕心實深焦灼所有培成多爾濟那木凱帶領京兵及察哈爾官兵並達洪阿帶領京兵均已催令起程統歸該大臣調度著勝保卽督兵星速兼程前進繞出賊前痛加剿洗正定爲省城門戶不可稍有疏虞恩華

所帶之兵亦由井陘一路出山現抵何處亦未據奏  
報著卽飛催前進合力攻擊托明阿西凌阿等追賊  
是否跟蹤緊躡其後何以未聞接仗並著隨時知照  
前後夾擊諒該大臣定能奮勉圖功速滅此賊以副  
重任

上又命軍機大臣傳諭文謙特克慎張起鵠曰天津密  
邇京師濱海要地不可不嚴加防備聞該處團練頗

有成效著文謙會同該鎮道認真督勸實力操演以  
資捍衛並飭在籍前任巡撫梁寶常督率倡辦至海  
口商民船隻亦須隨時嚴密稽查毋令奸細溷跡其  
陸路商販難民亦難保無匪徒假扮希圖窺伺虛實  
著文謙等密派妥幹之員隨處訪察儻有形跡可疑  
者卽行嚴拏究辦惟須持以鎮靜切勿張皇